

四庫全書

集部

欽定四庫全書

五百家播芳大全文粹卷九十三

宋 魏齊賢

葉 棻同輯

上梁文

府第

新居上梁文

辛幼安

百萬買宅千萬買鄰人生孰若安居之樂一年種穀十

年種木君子常有靜退之心久矣倦游于馬卜築稼軒  
居士生長西北仕宦東南頃到郎星繼聯卿月兩分帥  
閫三駕使輶不特風霜之手欲龜亦恐名利之髮將鶴  
欲得置錐之地遂營環堵之宮雖在城邑闐闐之中寔  
出車馬囂塵之外青山居上古木千章白水田頭新河  
十頃亦將東阡西陌混漁樵以交歡稚子家人共團藥  
而一笑夢寐少年之鞍馬沉酣古人之詩書雖云富貴  
逼人自覺林泉邀我望物外逍遙之趣吾亦愛吾廬語

人間奔競之流，卿自用卿法，如扶脩棟，庸慶拋梁。

拋梁東，坐看朝暾萬丈紅，直使便為江海客也。應憂國，願年豐。

拋梁西，萬里江湖路欲迷，家本秦人真將種，不妨賣劍買鋤犁。

拋梁南，小山排闥送晴嵐，遶林鳥鵲安枝後，一枕薰風睡正酣。

拋梁北，京路塵昏斷消息，人生直合在長沙，欲擊單于。

老無力

拋梁上虎豹九關名莫向且須天女散天花時至維摩  
小方丈

拋梁下鷄酒何時入鄰舍只今居士有新巢要葺軒窗  
看多稼

伏願上梁之後早收塵迹自樂餘年鬼神呵禁不祥伏  
臘倍承日給坐多嘉客日悅芳樽

花信亭上梁文

洪景伯

歷載買山方策勲于此日羣芳得地有喜報之祥風乃  
作新亭用酬勝概盤洲老人酷好行樂雅知倦游治盤  
洲百畝之宮費中戶十家之產物非容易而盡獲事歷  
艱難而晚成東閣西樓僅有一牛鳴之隔左花右竹幾  
乎兩蝸角之爭弗芥蒂于胸中若羈縻于化外灰心久  
矣唾手得之胡越為一家無爾界此疆之異雲夢吞九  
澤合遠山近水之奇草木皆知燕雀相賀畫棟侈丹青  
之飾雕欄呈紅紫之妍四時携酒則親朋足以娛嬉千

里命駕則故舊斯焉歎曲野無青草擁春徑之名葩菊  
有黃花送秋林之清馥閱冬舊夏敷之相繼任朝榮暮  
落之自然已駕虹梁須吟蠻紙

拋梁東日日來占花徑風長把芬香迎杖屨不將消息  
便鱗鴻

拋梁西丹桂盈林菊滿畦霜可拒時花恨老憂能忘處  
草慙低

拋梁南芍藥留春不脫驂夾岸芙蓉爭濯錦雙頭倒影

媚澄潭

拋梁北鷗思從容魚足食  
梅花滿眼雪花飄玉骨冰肌  
同一色

拋梁上東盼雙溪西楚望  
稍踈問信竹平安貪看穿花  
蝶來往

拋梁下蕙蘭叢菊宜在野  
閑披花史傍欄杆我欲雌黃  
賡演雅

伏願上梁之後風光益好  
樂事不衰三百六旬而歲成常



常乘興二十四番之花信一一飄香凡我同盟逢場作戲

容膝齋上梁文

洪景伯

寸地休心或發置錐之誚數椽容膝大勝環堵之區非  
坐井以觀天猶乘槎而問漢采栴但求於細木門闌不  
納于高車斤斧論功龜魚獻瑞盤洲老人技窮知止興  
盡倦飛半百年而日苦無多又踰十稔九萬里而風斯  
在下安敢肆言鷦鷯不過于一枝鳳凰始翔于千仞因  
山之麓倚竹為廬或駐屐而少留必橫琴而獨樂塵

外欲招于五老飲中難著于八仙抵掌而談不出柳州  
之景曲肱而枕可尋蟻蛭之游晝掩卷以盟鷗夜舉杯  
而勸月小以成小斯馬取斯霧塞華櫬沈沈者所以敗  
也風生圭竇綽綽然有餘裕哉雖不上言何妨下筆

齋之東九曲雙溪在眼中人世最難開口笑興來寧惜  
酒盃空

齋之西矮桃得地漸成蹊游鯤白逐天池樂此處相忘  
及澤鯢

齋之南斗大生涯亦可貪仙鳥有名身不到個中真趣  
上登三

齋之北坐看蠻觸干戈息度地休吟葛屨詩開疆盡掃  
槐安國

齋之上芥納須彌休說妄淺聞狹見小丈夫豈識汪汪  
千頃量

伏願落成之後四時常健一室易安危坐蒲團鳥有髀  
消之患緩行草徑更無股粟之憂凡今之人與我共此

聚螢齋上梁文

洪景伯

三葉決科更編花萼之集一經趾美當慕桂芳之詩月  
兔未明風螢可聚授諸梓匠建此山房盤洲老人世擅  
儒宗名標藝苑演輪輦禁仍父子者四人結綬鵷行踵  
兄弟于二府兒輩久聞于師說孫枝半離于童蒙欲增  
門戶之輝常佩輪輿之戒念焚膏而繼晷尚鑿壁以偷  
光肄業既勤策勲可必張口如吐雲霧雖懷綳簪笏以  
徒然聽履而上星辰盡燈火簡編之所致莫惜數年之

苦學誓言圖千佛之榮名良弓之子必為箕存心相續強  
弩之末不穿縞勉力有終茲頓雙枝試聽六詠

拋梁東一生窮達卜童蒙拚却數年稽古力拾青拖紫  
笑談中

拋梁西景到桑榆謾噬臍趣取光輝對黃卷任他簷外  
玉繩低

拋梁南燒燭尋書過草庵月練螢窗如白晝牙籤插架  
好窮探

拋梁北更漏迢迢天又黑短檠恭用也無嫌莫使疑塵  
棄牆側

拋梁上萬點飛星迷四望素頭乾死可憐渠人倦欲眠  
渠亦放

拋梁下不但膏油顛午夜清霜十月嘆飄零便有雪花  
可假借

伏願上梁之後筆更不輟書癖休醫詩書承家長作蟾  
宮之想朝昏挾策無貽螢燭之差傳之雲仍味有藥石

楚望樓上梁文

洪景伯

江漢分楚望昔聞騷客之詞西北有高樓茲占蠓州之  
景工師喜于得木龜筮未嘗違人繩墨旣陳鑿枘相合  
盤洲老人六年治圃三徑來蹊桃塢梨原雜百花而競  
秀溪堂水閣湧雙派以交流戲魚識鳴屐之聲馴鶴顧  
隨軒之步復營飛觀以俯西郊慕元龍百尺之名哦孫  
楚伍尋之賦變雲梯之新級如履坦途試耿雪之曲欄  
已橫踈影縱目而天光無際怡顏而日力有餘丘壑足

以起予草木誰不知我旁瞻廬阜納爽氣于軒楹前對  
鄱江發長謳于楫櫂將以登臨之暇時乎酬唱之娛從  
他燈火下歌臺且向園林窮勝事舞低揚柳月久灰年  
少之心棲老鳳凰枝獨結歲寒之友脩梁升也短韻來歟  
拋梁東雉堞連延紫極宮漁子入關爭早市艫人擊水  
快清風

拋梁西天際羌廬入望低花萼樓臺纔五尺庾筇來往  
印長堤



拋梁南萬頃風煙性所耽  
細草重茵春亘野澄江橫練  
月闌潭

拋梁北美竹如椽瀟洒國巢雲  
上下啟輕窗一覽芝山  
盈秀色

拋梁上落霞飛霧供清賞  
一聲長笛倚欄時待得蟾光  
紫蕙帳

拋梁下剩作茅廬容握馬  
藕花開後羽觴頻風掩窗扉  
回俗駕

伏願上梁之後日涉而風雨不渝雲卧而神仙可學笋  
菹魚醢進野老之晨羞羽衣虹裳邀江妃而夜話其誰  
歌馬同我盟鷗俛仰之間詠歌不足

小樓上梁文

葛謙白

考成板屋何慙南岳先生未辨石樓終愧香山居士歸  
愚老人上韓愈宜春之印歸肩吾雪水之廬芟薙北隅  
經營後圃將使樾蔭几席花艷壺觴雖無佛國之優曇  
上欠仙家之旌節然鉢孟傳杜鵑之種羯鼓開繁杏之

柯牡丹送婺女之星芍藥醉楚狂之子漁郎漾舟于桃  
花之側孺人憂瑟于辛夷之前亦足以暢叙幽情淹留  
歡緒爰登層臺下視綺原臬臬露梢蒸綵霞而拂檻重  
重烟葉展翠幄以承檠有是賞心何辭屬役既謀龜筮  
用舉虹梁

拋梁東曲港飛橋一葦通鹿苑寺前魚酒市趨墟時有  
杖藜翁

拋梁西倒影千峯落畫溪一望滄浪芳薄裏幾番腰裏

綠楊枝

拋梁南鐵鳳華鯨響淨藍飛錫何方來白足為人時演  
後三三

拋梁北岩岫峩峩生翠滴山中莫遣曉猿驚驛路須防  
德璋勒

拋梁上醮幄翻空薇作帳凭欄細細萬花梢要看春工  
雕刻相

拋梁下閒裏花陰買無價蒼苔繡地長鋤痕智井汲泉

金石錄卷九十三  
生石錄

伏願上梁之後享衛武之百年朋魯僖之三壽一百九十策榮及曾孫三萬六十觴醉同賓友縣茲福筭波及問里

獨善堂上梁文

熊子復

葺汾曲之廬首奉丹青之像襲茂陵之藁高恭金石之藏祠堂用炤于赤堤書閣更況于翠壟恭惟先君獨善居士誠存省已孝篤慕親遠求百世之師近取一鄉之

友錦囊收拾頡詩人之芳腴瓊簡發揮探道家之秘妙  
益隱以求其志彼用相忘而窮則善其身此宜自號纔  
躋下壽殊鬱長才藐茲小子之悻痛我先人之逝積有  
餘慶方啟世科潛發幽光尚資野錄載營敝墅肇舉脩  
梁屋茅捲去三層夙已聞于徹故井泉掘通九仞嗣將  
見于取新採建溪稚子之謠彰宋野遺民之迹

先君亦  
號宋野

遺民

拋梁東鶴巢山翠倚春空誰過仲舒墜下馬賢良百載

有高風

先祖賢良墓在其東

拋梁西百尺潭中曉霧迷  
仙槎有客乘將去  
遡紫凌青路較低

拋梁南採藥仙童記  
二三丹成只在元游處  
昨夜靈光現翠嵐

拋梁北武夷九曲仙人宅  
幔亭燕罷挈舟來  
好傳天上真消息

拋梁上小築臨清無大壯  
星躔不但少微明  
曾占日暈

中興象

拋梁下十里渾無高浪駕有時風動錦霞翻一葉中流

翁未怕

雨珠波上擲霞錦浪  
中翻先君詩句也

伏願上梁之後徑存松菊而想昔之樂園收芋栗而幸  
今之豐滄浪清水之濯纓既招孺子竅竊錄山之燃竹  
更伴漁翁挹此間之爽氣接吾父之流風

寺觀

金山大殿上梁文

孫仲益



萬川東注一島中分長江介吳楚之衝故剝踵梁陳之  
舊肇新蘭若寅奉金仙都尉太尉得正法眼藏而現宰  
官了一大因緣而作佛事眷茲勝地獨有頽基鍾鼓不  
鳴龍象皆泣毘耶城大居士已屬當仁妙高臺老比丘  
而為說法指囷分粟除地布金嗣開祇樹給孤之園首  
建釋迦莊嚴之殿六鰲負出三神山仙聖之宮一鷲飛  
來四大海神龍之會迥起諸天之上中巖兩足之尊仰  
止仁祠俯伸報地大安國步如北海若之難窮永錫帝

齡等西方佛之無量爰屬脩梁之舉共賡擊壤之歌

拋梁東赤岸銀河一水通萬疊彤雲竟天起六龍推出

半輪紅

拋梁西草舍廡城望眼迷日脚未收蛻飲海濤頭初上

雪平堤

拋梁南一勺中冷乳水甘殿閣風來鈴自語曼陀花雨

落毳毳

拋梁北北戶星光珠的爍夜鶴休驚蕙帳空古佛同龕

有彌勒

拋梁上堂堂丈六真金相光華五色爛摩尼八部龍天  
畫回向

拋梁下二士三生本同社庭前枯柏自長春袖裏靈珠  
光不夜

伏願上梁之後四恩擁祐十方護持萬德從衆香之鉢  
而來羣魔分一炬之燈而去三登歲美百順人康六合  
渾同城池有金湯之固千齡際會山河書帶礪之盟凡

在見聞共茲快樂

資聖寺上梁文

孫仲益

肇門勝地化出寶坊大啟重闈同登覺路恭惟資聖堂  
頭圓明大師悟最上乘法現比丘尼身住舍衛國給孤  
之園坐毗邪城維摩之室佛光續千燈之照天花呈五  
葉之祥畀新六代故刹之遺雄視一方叢林之冠乃涓  
穀旦爰舉萬德瞻依百神呵護迎白象駕擁金盤陀開  
黃龍闕踞鉄門限月標指上珠現衣中穴癡蠅之紙而

見日光發醯鷄之蒙而睹天大盍申善頌用佐歡謔

拋梁東一點龕燈照佛紅卧聽木魚呼曉粥悠悠殘漏  
履聲中

拋梁西直指靈山路不迷莫作瑤池阿母看全身自拍  
佛肩齊

拋梁南待試曹溪一勺甘嶺上伽梨拈不起憑師更說  
後三三

拋梁北身前身後三生石住世因循五百年兩手摩挲

話銅狄

拋梁上寶蓋盤空蔭龍象堂堂一路摠持門煌煌百寶

光明藏

拋梁下地布黃金光不夜湧出青蓮十丈高不比凡花  
有開謝

伏願上梁之後三靈不應千佛光臨泰塔調玉燭之和  
寶歷驗蘿圖之固官僚有九遷之喜士庶迎百順之休  
應生不住布施之心同證無上菩提之道

醴泉觀三門上梁文

歐陽永叔

我國家膺三靈之眷命革五代之荒屯多壘削平包干  
戈而偃武四方無警銷烽燧以承風逮先聖之撫臨躋  
羣生于富壽乃欲追羲軒以並軌歟雲臺而勒成容典  
交脩遂舉曠古難行之禮瑞應來集有非人力可致之  
祥卿雲喬露之光紛綸而雜委朱草靈芝之秀焜耀而  
叢生爰有神泉湧茲福地甘如飲醴美可蠲痾湛靈液  
以淵渟敞琳宮而崛起歲時猶豫順民俗之樂康棟宇

翼嚴來京師之壯麗近以有司不謹飛焰延災皇上愛  
物推仁因民所利顧遺基之歸爾回聖慮以惻然爰飭  
良工載新有作捐其土木之費所以寬民適以奢儉之  
之中俾之可久用涓吉日構此脩梁盍効歡謠形于善  
祝

拋梁東危構峩彩露中欲識聖君仁及物靈源一勺  
本無窮

拋梁西金碧相輝俯仰迷萬瓦寒光浮瑞露層簷晚景



掛晴蜺

拋梁南善利功深不可談但喜斯民無疾癘誰知靈液  
有餘甘

拋梁北觀者如雲來九陌四方萬國會京師有類衆星  
環北極

拋梁上棟宇規模標大壯落成行即慶良辰望幸何時  
來綵仗

拋梁下祈福為民崇慶厦四時和氣致休祥萬國多歡

洽朝野

伏願上梁之後三辰順軌百穀豐登卉服雕題咸被垂衣之化行歌戴白永垂擊壤之文

天慶觀上梁文

呂貴克

藝祖建國章聖崇真爰詔邇遐各嚴祠宇雖邊徼蠻荒之服頌天書金寶之祥名山大川咸介無疆之壽皇天后土永隆不拔之基眷我樵城舊崇天慶奉帝祖儲休之所乃祥符植福之宮不幸妖烽遂為廢地列聖升騰

于寥廓九龍潛躍于淵深

觀舊名九龍池見有九龍

成一區瓦礫之

荒場晦千里江山之秀氣黃冠羽服立心廣募于衆綠

富室大家協力共成于盛事神靈不昧興復有時殿堂

增壯于前規鐘鼓一新于舊觀獨繙經之堂未剏而祝

堯之地方虛久矣無聞誠哉闕典有一居士率上大夫

作意經營同誠勸化曾未期年之久俄驚輪奐之新棟

宇翬飛椽題山立衆稱盡美豈但苟全似仙家官府之

雄疑神運鬼功之速載涓穀旦用舉脩梁命彼倫伶同

伸善頌

拋梁東地遠山高仰日宮拱極星明光燦燦繼明兩帝  
壽崇崇

拋梁西十里來山出澗溪福地古先誰卜兆地靈興廢  
豈無時

拋梁南得道真人聚碧嵐寄語蓬萊方丈客不須海上

有三山

郡南有山號道人二峯

拋梁北文字五千談道德華封祝罷効嵩呼不愧金門

稱羽客

拋梁上聖治太平安有象千秋萬歲樂時康祝壽可能  
忘將相

拋梁下歲歲秋冬春復夏黃童白叟慶年豐鼓腹謳歌  
陶聖化

伏願上梁之後升堂肅肅祝壽琅琅二帝同歡霄筭高  
深于嶽瀆中原恢復版圖記載于山川多士以寧百僚  
任職金枝翁翁玉牒離離宗廟威靈保邦家于永固祖

宗德澤惠民社于無窮

玉仙堂上梁文

熊子復

天開大府六龍升代邸之潛地作高臺雙鶴下浮丘之  
馭若時勝境孰會靈蹤玉洞鸞洲岡阻而列其真宇金  
坡鳳掖岳牧而用此詞人知府待制尚書妙學除空雄  
文振古牝糠盡掃傳家分雲漢之裳藻鑑獨持致位上  
星辰之履暫來宣于藩化佇入贊于廟謀繫風月之誰  
分諒江山之我助具宮可俯漾寶額于重淵丹灶尚存

耀靈光于絕巘肆褒舊跡肇揭新名燕寢香凝曉開褒  
陽叔子之閣寒城烟淡晚上武昌元規之樓有覺其楹  
不愆于素翬騫畫棟回江淹碧草之春虹引雕梁散張  
湛紫雲之雨宜形頌嘆以壯經營

拋梁東舊尹重來千騎雄鳳苑靈牙抽曉露鶴峰王氣  
靄晴空

拋梁西雲合秋空映彩霓神藻飄來洞靈宇仙花泛出  
武夷溪

拋梁南烟外孤鷺有客驂梅灶仙傳丹鼎液芝峯帝兆  
紫泥函

拋梁北漢闕詔歸前夜席窻扃雲霧拱皇居履曳星辰  
環帝極

拋梁上寥廓太虛含萬象揮斧輕裁寶月團乘槎穩泛  
銀河浪

拋梁下庭轉棠陰日多暇山襟水帶望重城風震雨凌  
依廣廈



伏願上梁之後甘棠教美華黍時豐豈乘蓬萊之清風游  
雅懷于塵外依芙蓉之淥水聚雋客于幕中兵絕弄而  
潢池既息形弗犯而囹圄斯空早旋歸于政府永輔贊  
于法宮

廟宇橋船

夫子廟上梁文

石守道

日月不盛大星辰不衆多無以昭天之明山岳不磅礴  
江海不橫瀉無以彰地之載制度不恢廓宮室不壯麗

無以示聖人之尊天明不照衆庶何所仰也地厚不載  
萬物何所附也聖人不尊羣儒何所法也况藝祖始興  
之地先皇親狩之都鼎峙為京自四畿相附而先聖廟  
齷齪僻陋不堪其憂何以壯遠人之望示四方之則哉  
留守尚書公下車日餘政未及施首嚴聖祠亳人承風  
偃化相率出錢二百萬購材于河陽咸得大木以新厥  
居輪焉奐焉京邑翼翼衆人開聾發瞽知聖師之尊且  
大廟作凡三月而成功有司告十二月二日吉請上梁

焉公命盛食以落之

拋梁東夫子之道岱岳並崇

拋梁西夫子之道太華與齊

拋梁南夫子之道衡岳相參

拋梁北夫子之道常山北極

拋梁上夫子之道如天可仰

拋梁下夫子之道如地不瀉

伏願上梁之後留守尚書公入持國鈞正位台席行聖

師之道上以致君子堯舜之上下以躋斯民于仁壽之  
域萬斯年兮主聖臣直

北岳景貺門上梁文

程子山

山尊常岳府秘蘭臺光分卑昂之精肇建神明之宅配  
天作鎮盤三千里之宏基與地儲靈產十九種之神草  
有嚴闕宇夙奉睟容四時之牲幣交修一方之耳目咸  
仰歲月滋久梁棟弗修方妙道之勃興當真人之在御  
載新寶構大闡琳宮益彰帝所之尊用侈民心之報恭

惟皇帝陛下懋建皇極允執道樞諸佛効祥衆珍來集  
九功惟叙百穀用成茂對天休恩答神佑乃眷明靈之  
嘉德增崇館御之宏模鎮朔之殿旣嚴景眈之門有闕  
丹輿綠輦駐真馭之翱翔碧瓦朱甍儼帝居之縹緲克  
舉脩梁之吉日敢伸善頌之歡謠

拋梁東禮樂車書萬里同政出青陽明杲日仁漸滄海  
作和風

拋梁西葱嶺來王路不迷四海一家無事日聖人萬福

與天齊

拋梁南壁門金闕斗相參山同天保詩人詠星入清秋

太史占

拋梁北岳靈鎮地扶天德五兵不試靜邊塵玉帛年年

朝萬國

拋梁上千楹寶構嚴神像來游來燕福無疆屹立皋門

昭景貺

拋梁下瓊輪羽蓋神來舍千秋萬歲壽君王九功八政

安華夏

伏願上梁之後宸心悅豫寶厯綿長帝業等河山之固  
皇明垂日月之光天瑞申錫邦基永昌九譯夷情之悅  
四方民俗之康賴一人之有慶保萬壽之無疆

溪東祠宮上梁文

黃泰之

築室于道維艱其成有功于民式嚴厥祀矧此山川之  
勝寔惟香火之憑風雨百年寢隳其故里閭萬口易舊  
而新人不告勞神亦陰助修梁載舉善頌攸陳

拋梁東東倚崇崗氣象雄社社鷄豚迎歲事村村花柳  
足春風

拋梁西無限青山遠碧溪流水迢迢環玉帶橫橋隱隱  
接雲梯

拋梁南排闥羣峯擁翠嵐出相佇符岩石望祝君長與  
老人叅

拋梁北北嶺嵯峩陵斗極何處推來重疊山祇應鎮鎖  
英靈宅



拋梁上漠漠祥烟迷四望天開符讖應重來人指規模  
今益壯

拋梁下一派清漪入圖畫兩度重看虎榜來十年又是  
龍頭跨

伏願上梁之後神靈安止民物熙然里無犬吠之防道  
乏喘牛之問文風益茂盛事鼎來導景貺于無窮指榮  
封之有日

龍溪橋上梁文

黃泰之

天不靳材橋斯重建人方病涉事可辭難旁觀爭袖手  
之時亦投機不容髮之會旣鄉民攻于不日而斤匠用  
以成風宜指撝叱咤而一新雄偉之功俾艱難嶮巖者  
均獲坦夷之樂上梁協力拍手同歌

拋梁東東望羊峯氣象雄已覩瑞光浮曉日會看新與  
駕東風

拋梁西幾曲清溪映綠霓拭目渾疑朝雨足捲簾更看  
暮山低

拋梁南崇壽峯高碧落參望極瞻星長祝筭披風憇暑  
為停驂

拋梁北北嶺嵯峩陵斗極梢雲長榦榦天機蔽日清陰  
分野色

拋梁上歷歷羣山環四望夜喚騷人漱月杯春邀野客  
尋芳杖

拋梁下一帶縈紆入圖畫當年何必濟乘輿異日長看  
乘駟馬

伏願上梁之後懋無于有易塞而通峙宏基于不朽綿  
巨濟于無窮載績厥功猶是百年之父老坐蒙其利更  
娛幾代之兒童既山川之改觀宜福祿之來同

巨艦上梁文

竊以江西右連荆楚左涉勾吳萬壑喧虺聲搖厚地三  
江頽洞勢蹴遙天浩乎雲水之鄉必也舟船之利某官  
英姿肅毅茂識踈通大振紀綱笑談自若力摧姦惡智  
畧有餘乃鳩集于良工仍選掄于名木萬指敏于風雨

兩艦屹若丘山下此吉辰謀升巨棟兒郎醉飽已慰其  
勤勞士女歡呼願聞于歌頌

拋梁東巨艦如山浩淼中寄語不須紅錦纜詔書新用  
紫泥封

拋梁西向道江南踏浪兒不用吳音相調笑使君能製  
擢歌詩

拋梁南揖仙橋下水拖藍怖殺鼃鼃與龜鱉紅舡百丈  
照青潭


拋梁北他日王孫朝上國龍翁願借一帆風飛過江西  
如電射

拋梁上莫放蛟龍掀翠浪要湏置酒坐船頭下看江練  
平如掌

拋梁下看取一川青擺檝兒郎醉看不須憂今年米熟  
無高價

伏願上梁之後某官身名益峻壽祿加隆綵衣日戲于  
庭幃紫綬入翔于近列從容千里莫知水國之遙安穩

一帆不覺長安之遠



五百家播芳大全文粹卷九十三

欽定四庫全書

集部

五百家播芳大全文粹卷九十五

詳校官侍郎臣劉躍雲

助教臣常循覆勘

總校官編修臣王燕緒

校對官中書臣范 鏊

謄錄監生臣桑 英



欽定四庫全書

五百家播芳大全文粹卷九十四

宋 魏齊賢

葉 茶同輯

祭文

名賢 尊官

祭司馬溫公文

蘇子瞻

先豐之末天步維艱社稷之衛中外所屬惟是一老屏

于一人名高當世行滿天下措國于太山之安下令于  
流水之源歲月未周紀綱畧定天若相之又復奪之殄  
瘁之哀古今所共知之者神考用之者聖母馴致其道  
太平可期長為宗臣以表後世往莫其葬庶知子懷

祭司馬溫公文

蘇子瞻

左僕射贈太師溫公之靈嗚呼百世一人千載一時維  
時與人鮮偶常竒公事仁宗百未一施獨發大議惟天  
我知原陵之初先事而規帝欲得民一尊無私母子之

間莫如孝慈人所難言我所易知神宗知公敬如蒼龜  
專談仁義輔以詩書枉尺直尋覬公少卑公曰天子舜  
禹之姿我若言利非天誰欺退居于洛四海是儀化及  
豚魚名聞乳兒二聖見公曰予得師付以衡石惟公所  
為公亦何為視民所宜有莠則鋤有疾則醫問疾所生  
師老兵疲和戎上策決用無疑此計一定太平可基譬  
如農夫既闢既苗投種未粒刈穫而炊賓客滿門公以  
病辭不見十日入哭其帷天為雨泣路人垂涕畫像于

家飲食必祠矧我衆僚左右疇咨共載一舟喪其楫維  
終天之訣寧復來思歌此莫章以侑一卮

祭韓忠獻魏公文

司馬溫公

惟公仁義忠厚得之自然所施所履命世之賢冠登甲  
科聲名四傳睽輝冊府表暴英躔迴翔諫署風節孤騫  
擢升法從壯觀近班賊吳叛命西領中權經畫應禦勤  
勞累年戎醜來庭延登樞府道德之俊同時入輔室姦  
塞邪剗弊除蠹謗言陰搖分符以去中山大齒太行東

西連開戎府彈壓羌夷天聲萬里雷動神馳帝思勲舊  
召還廟堂帷幄論道海寓樂康仁廟晚年少陽虛位天  
下大本未有所繫公常深念圖建冢嗣引古畫言山岳  
其意忘身忘家無所顧忌聖心感悟遂定大計合天符  
人英廟主噐夷夏歡呼聲震天地十艱萬險公若平易  
六龍飛天帖無一事俄膺顯命今上嗣政永厚復土力  
辭大柄得殿本邦均休遂性未離闕庭西陲微擾天子  
詔公改帥咸鎬義不辭難受命戒道事寧求還復守鄉

閭至始閱月又遷魏都時議者建青苗之令出錢取息  
始惠終病抗疏論列辭嚴義正天子動容賢路交慶四  
見炎涼復臨安陽燦燦錦衣煌煌繡裳願上印綬十拜  
封章宸眷深厚未頌俞音遽嘆逝川莫伸素志嗚呼哀  
哉自公之薨城邑田里老壯童幼咨嗟涕泗非德感人  
孰能如是位居將相殆將二紀萬鍾之祿隨得隨施姻  
親倚容賴公以濟蓋棺之日所餘無幾清白之風照耀  
來世某之稚愚少有倫比久忝賓從納顧特異朝教暮

誨意均子弟粗有成立皆公之賜撫膺長號肝腸將毀  
莫以叙哀痛無窮已英靈不昧敢冀歆此

祭范文正文

王介甫

我公一世之師由初迄終名節無疵明肅之盛身危志  
殖瑤華失位又隨以斥治功亟聞尹帝之都閉姦興良  
稚子歌呼赫赫之家萬首俯趨獨繩其私以走江湖士  
爭留公蹈禍不慄有危其辭竭與俱出風俗之衰駭正  
怡邪蹇蹇我初人以疑嗟力行不回慕者興起儒先酋

欽定四庫全書

五百家播芳大全文粹  
卷九十四

四

酋以節相侈公之在貶愈勇為忠稽前引古誼不營躬  
外更三州施有餘澤如醜河江以灌尋尺宿賊自解不  
以刑加獨盜函仁終老無邪講藝絃歌慕來千里溝川  
障澤田桑有喜戎孽獠狂散騎我疆鑄印刻符公屏一  
方取將于伍后常名顯收士至佐維邦之彥聲之所加  
虜不敢瀕以其餘威走敵完鄰昔也始至瘡痍滿道藥  
之養之内外完好既其無為飲酒笑歌百城宴眠吏士  
委蛇上嘉曰材以副樞密稽首辭讓至于六七遂叅宰

相釐我典常扶賢贊傑亂冗除荒官吏于朝士變于鄉

百治具脩偷墮勉強彼闕不遂歸傾帝側卒屏于外身  
屯道塞謂宜耆老尚有以為神乎孰忍使至于斯益公  
之才猶不盡世肆其經綸功孰與計自公之貴廩庫逾  
空夷其色辭傲訐以容化于婦妾不靡珠玉翼翼公子  
弊締惡粟閔死憐窮惟是之奢孤女以嫁男成厥家孰  
埋于深孰鏗乎厚其傳甚詳以法永久碩人今亡邦國  
之憂矧鄙不肖辱公知尤承凶萬里不往而留涕哭馳  
詞以贊醴羞

欽定四庫全書

五百家播芳大全文粹  
卷九十四

五

祭呂申公文

程養正

公稟則異得天之粹遺茲昌辰出為嘉瑞生而富貴處  
之無累幼而聰明充之能至學既知真仕則為道出入  
屢更險夷一操二聖臨御人望是從起藩入輔命相冊  
公平日視公靜默恂恂國論無斷一言萬鈞謂公無位  
位為卿相謂公得志志存未伸然公心如權衡所以無  
間言于率土德如山岳所以致敬心于人主從容語默

之間人孰量其無補胡上天之不弔不一老之慙遺淵  
水無涯將孰求于攸躋百身莫贖為有識之同悲嗚呼  
哀哉羸老餘生辱知有素二男論亡執之交不偶無酬  
知之路但臨穴以伸哀託文辭而披露想英靈今如在  
鑒丹誠而來顧

祭歐陽文忠公文

王介甫

夫事有人力之可致猶不可期况乎天理之溟溟又安  
可得而推惟公生有聞于當時死有傳于後世苟能如



是足矣而亦又何悲如公器質之深厚知識之高遠而輔以學術之精微故充于文章見于議論豪健俊偉怪巧瑰琦其積于中者浩如江河之停蓄其發于外者爛如日星之光輝其清音幽韻淒如飄風急雨之驟至其雄詞宏辨快如輕車駿馬之奔馳世之學者無問乎識與不識而讀其文則其人可知嗚呼自公仕宦四十年上下往復感世路之崎嶇雖迭遭困躓竄斥流離而終不可掩者以其公議之是非既壓復起遂顯于世果敢之

氣剛正之節至晚而不衰方仁宗皇帝臨朝之末年顧  
念後事謂如公者可寄以社稷之安危及夫發謀決策  
從容指顧立定大計謂千載而一時功名成就不居而  
去其出處進退又庶乎英魄靈氣不隨異物腐敗而長  
在乎箕山之側與潁水之湄然天下之無賢不肖且猶  
為涕泣而歔歔而况朝士大夫平昔從遊又予心之所  
嚮慕而瞻依嗚呼盛衰興廢之理自古如此而臨風想  
望不能忘情者念公之不可復見而其誰與歸

祭歐陽文忠公文

曾子固

維公學為儒宗材不世出文章逸發醇深炳蔚體備韓  
馬思兼莊屈垂光簡編焯若星日絕去刀尺渾然天質  
詞窮卷盡含意未卒讀者心醒開蒙愈疾當代一人顧  
無儔匹諫垣抗議氣震回通鼓行而前跋躑非恤世偽  
難勝孤堅竟室紫微玉堂獨當大筆五典三謨生明藏  
室頌挫彌厲誠純志一斟酌損益論思得失經體慮萌  
沃心造膝帝曰汝賢引登輔弼公在廟堂尊明道術清

靜簡易仁民愛物斂不煩苛令無迫猝棲置不索里安  
戶逸櫛斂兵革天清地謐日進昌言從容密勿開建國  
本情忠力悉殫未之歲龍駕鼯歎再拯大艱垂紳秉笏  
乾坤正位上下有秩功被社稷等夷召畢公在廟堂摠  
持紀律一用公直兩忘猜昵不挾朋比不虞訕嫉獨立  
不回其剛仡仡愛養人材獎成誘掖甄拔寒素振興滯  
屈以為已任無有廢拂惟公平生豈弟忠實內外洞徹  
初終若一年始六十懇辭冕黻連章累歲乃俞所乞放

意丘樊脫遺羈馬沉浸圖史左右琴瑟氣志浩然不陋  
蓬華意謂百齡重休累吉還幹鼎軸贊微計密云胡傾  
殂慙遺則弗聞訃失聲皆涕橫溢恣冥不敏早蒙振拔  
言由公誨行由公率戴德不酬懷情獨鬱西望輻車莫  
持紉緇惟公華華德意譔述為後世法終天不沒托詞  
叙心曷能髣髴

祭歐陽文忠公文

陳無已

祭尚德而報功三代以來共之賴故有學而置師弟子

員講試如法蓋自公始賴之為州尚矣而良士大夫生而善其俗死而祭于學亦莫宜于公惟公翼亮三聖出入十年建明大策以康社稷是宜配食清廟而絃歌之豈特稱一邦而慰一鄉之思哉師道承命為吏有列于學授事之初敬脩故事

祭杜祁公文

歐陽永叔

士之進顯于榮祿者莫不欲安享于豐腴公為輔弼飲食起居如陋巷之士環堵之儒他人不堪公處愉愉士

之退老而歸休者所以思自放于閒適公居于家心在于國思慮精深言詞感激或達旦不寐或憂形于色如在朝廷而有官職嗚呼進不知富貴之為樂退不忘天下以為心故行于已者老益篤而信于人者久愈深人之愛公寧有厭已壽胡不多八十而止自公之喪道路嗟咨况于愚鄙久辱公知繫官在朝心往神馳送不臨穴哭不望帷街詞寫恨有涕漣而

祭張魏公文

代

呂伯恭

鼎分三極中貫至誠扶世建俗經幽緯明明此北面龍  
臣鴻弼侯皋侯夔侯旦侯奭前授後承皆原于一降秦  
迄唐中間幾息既極乃通是開魏公有遠其傳有統其  
宗匪符匪節匪券而同厥初事親自誠而孝基德寢門  
參騫是蹈肆其事君自誠而忠四朝一心本始末終昔  
在建炎為國馳驚蝨賊內訌將禭天路廼義其旗馳囊  
走羽爇彼妖焰萬河並注掃除黃道手扶日馭勾陳太  
微莫不順序始命樞極再命臺衡柄是文武內拊外征



我雨我露我雷我霆爍起蝨屯隨指而平樞脫之酋瓊  
毳之渠威名所加失戈墮車既其無為里忻戶愉羣獻  
具來翼帝之圖孰促其成放迹江湖已貴不賤已豐不  
約零陵之居韋布所愕披剝萬象獨全至樂身外鸞臺  
夢中麟閣戎馬飲江奪公間燕巨轂高幢陪都是殿大  
人繼明登我元臣爾衮爾鉞坯治載新瞋目語難熊羆  
貌虎聞公之升屯歌壘舞野耕肆商秀眉垂髻聞公之  
升連手嬉遨北邊有興馮牙祭纛志之所期欲無遐徼

挈輿地圖還之清廟炯炯丹衷日月所照帝閔公勞佚  
以珠庭歛騎箕尾上比列星殄瘁之悲萬方同升某頃  
以孱陋遠戍邊城敵情叵測民力弗勝條利害病狂言  
屢興朝叩暮應是獎是稱籌恩權惠丘山猶輕几几赤  
烏庶幾快覩未目德輝已耳凶訃扁舟西還飛旒南去  
隻鷄斗酒莫展情愫公視死生猶旦與暮一氣闔闢新  
新故故默友造物冒此下土我獨何為淚落雕俎

祭張魏公文

王龜齡

惟公學造明誠才全文武忠孝根于天性節操貫乎歲  
寒社稷之功最高親當取日君父之讐未報誓不共天  
二十年見斥權臣五百載重逢聖主夷狄服汾陽威德  
兒童知司馬姓名意者天必相之嗟乎命何止此方渡  
江而擊楫遽樂聖以銜盃宣室興思蒼生望起雖曰閉  
門絕粒不忘憂國愛君中山功未及成讒謗之書盈篋  
武侯起有遺恨英雄之淚滿襟一老不遺百身莫贖某  
濫此假守驚聞訃音忽觀絕筆之銘愧阻臨棺之奠嗟

吾道之窮已甚非夫人之慟而誰

祭范蜀公文

蘇子瞻

仁宗在位四十二年畦而種之有德皆賢既歷三世悉  
為名臣今如晨星存者幾人孰如我公碩大光明導日  
而升燦馬長庚死生契濶公獨壽考天寔者之以殿諸  
老二聖嗣位仁義是施公昔所言畧行無遺雖樂未和  
公寢不寧樂成而薨公往則瞑凡百君子願公無極胡  
不萬年以重王國責難之忠愛莫助之嗟我後來誰復

似之吾先君子秉德不耀與公弟兄一日之少窮達不齊歡則無間先友盡矣我亦白髮聞公之喪方食哽噎堂堂我公豈其云亡望公凜然猶舉我觴

祭文清曾公文代

呂伯恭

嗚呼邈丘壑之韻者身清而命未必厚鴻彞鼎之勛者命厚而身未必清判兩途而分鶩猶參商與渭涇著香山之退傳遺簪組而沉冥澹酬風而酢月陶至樂于林垆蹇降命之多奇屢哭殤于頽齡若汾陽之元老庇九

族以咸寧驅總總而埽迹紛角羈而志名極二紀之豪華醉世味而未醒蓋挹其至清則厚福不得而多取居其至厚則清趣不可以力爭惟大人之所厚合內外而俱亨還紫橐而却蒲輪頽然天放者既專物外之樂道板輿而奉鳩杖驪然色養者又擅區中之榮等之香山則無憐戚權之汾陽則未嘗滿盈全古人之未全曠千世其難并乘至全而反真夫何憾于泉扃然而墜一世之師表奪四朝之典刑涸洙泗之淵源絕風騷之統盟

凡槩人與墨客胥霄涕而失聲眇孤生之孱陋夙受知  
于門庭輩子姪以拊育迨衰弱之星星歸印綬以盡哀  
迫科法之見繩傳壺觴而徃酬淚隨河以東傾

祭忠簡趙公文代

維四年冬十有一月哉生明越二日壬戌左奉議郎權  
發遣衢州某祇事之初敬遣左廸郎常山尉周暕以卮  
酒泮餐致祭于故丞相忠簡趙公之靈維公高風懿躅  
映照今昔下自管葛所在不數中遭讒逐以卒于死

至行路為公出涕不三十年是非一定中興名相一夢而已有來假守敢言尚德南望楸梧去我百里官箴有常莫克敬告歸心典刑有如卮酒

祭忠簡趙公文

維五年冬十有一月哉生魄越翼日己巳左奉議郎權發遣衢州軍州事借緋劉夙敬遣同僚以卮酒泮餐致祭于故丞相忠簡趙公之靈古者愛其所憇之棠不忍其憔悴尋斧斤焉諸葛武侯異代名德環祠十里堯



夫芸婦望而不去不敢加寸刃于無知之草木彼豈有德于後之人而感今懷昔慕義無窮如是耶公道在海內如皎日殆有不約而然矧伊元德相我中興有教化有典有刑赫然朝廷號小元祐而埋玉九京葬不以禮有司懼焉鳩工薙土增新益舊亦惟閱月乃克既事乃知獻賢尚德揭大義以詔頽俗古之人誠有不待下車而為之者此則夙奚敢率禮義之成走吏以告惟公其享之尚饗

祭寶學劉公文

代

謹以淨香蔬食茶果之奠敢昭告于近故大檀越宮使  
寶學侍郎劉公之靈嗚呼哀哉我公遽至斯耶自昔大  
賢之生于世或懷寶自珍而不屑于仕或仕而不獲盡  
見其設施皆生民之不幸而遺後世之悲我公云亡邦  
國殄瘁縉紳大夫有識之士聞者孰不為哽齟者乎唯  
公之生質甚厚憑藉之資儒學故家忠孝世濟而天之  
所賦猶為碩大瑰奇遭時艱難戎服驅馳決策行營叅

畫西師功施社稷天下孰得而知謂公當歸論道黃扉  
以輔中興成億萬齡之鴻基名高衆忌投杼生疑剖符  
外補為國藩維而溫陵鎮江之政吏畏其威民賴其慈  
顧後瞻前配公者誰百千載猶將播風謠而流詠思也  
嗚呼我公才任樞楹知侔著龜義氣橫六合英聲聞四  
夷然已試而不獲究其所蘊造化之意人又孰得而窺  
頃就閑而得請持從橐而奉祠親庭戲綵棣萼相輝悟  
槐宮之大夢契柏子之妙機澹然忘懷與世娛嬉謂仁

賢而必壽公宜黃髮而期願何一疾之不瘳而遽至斯  
耶某以愚陋之質出入公門者二紀于茲嗟小識之窳  
啟譬螢爝之甚微公獨眷之前挽後推荷獎拂之過情  
輒顏厚而怛怩頃還故園蒲柳衰遲廬仙洲之谷分甘  
栽田博飯而終身糗藜枉手書以見存延以拱辰之招  
提唯先公忠顯之松楸瓌璇椽而壁題豈以道相索于  
形骸之外而遂忘其病骨之支離辱盛意之再三欲避  
命以何辭悵從公之未幾忽夜壑之舟移萬夫莫贖哲

人其萎念話言之在耳腸糾結而涕洟豈壓塵境之濁  
濁凌紫清而騎尾箕而與世永遠者乎蔬菽香薺侑以  
哀詞惟我公不忘疇昔之好英風爽氣傑然而不可沒  
者猶將鑒之也已乎尚饗

祭劉共父樞密文

朱晦翁

維淳熙五年歲次戊戌九月辛酉朔二十日庚辰從表  
弟具位某之靈嗚呼哀哉天胡付公以瓌奇俊偉之材  
而不并假以耆耄期耄之壽胡位公以樞機藩屏之重

而不遂界以彌綸輔贊之權使公名若極富貴而無欲  
寔則抱憂嘆以終天此中外志義之士所以聞公之薨  
皆失聲而相弔或雖未識公面而亦不自知其涕泗之  
流漣者也嗚呼哀哉惟公生有異質早擢巍科退而自  
保弗競弗譁屈首受書典學于家內充其美外振厥華  
暨登王朝遂掌綸綍獻納綢繆訐謨密勿忤觸權要無  
所回屈帝眷弗渝試以郡紱受鉞于南勦頑踣凶婉孌  
赤子撫摩哀恫禮賢勸學導和致豐報政三年鄒魯其

風帝曰來歸本我兵柄曾不幾時咨以大政公奮其庸  
帝虛以聽張磔宏綱塞絕僭令道直身危突不暇黔出  
臨兩鎮威焯恩漸適嬉于堂遽哭于苦思詔起之有疎  
其瞻公卧弗承帝悉其孝曰究汝哀來覲來教公言益  
切公守不撓再撫于潭亦顯其效乃遷建業民病以飢  
公不寢食起坐咨嗟方畧旣張惠術四施曾是流莩化  
為充肥帝嘉乃勛加勞進律倚毘方深遽告以疾忠無  
隱情諫有遺筆帝驚罷朝悼此良弼嗚呼哀哉我以孤

童來托公家公不鄙我勸導有加公姿鸞鵠我性麀麀  
豈無異同卒莫疵瑕自公進為論議慷慨寔始斯公高  
明光大公之知我亦晚而最迨其永歸手札告戒褒德  
撫孤古昔所難并以諉我我其敢安把書長號涕隕闡  
干還生以思慨其永嘆念昔帝師為國死義亞傳承之  
夷險一致屏山雖隱亦豈忘世公襲其傳克廣無替衆  
咸謂公當訖外庸入贊皇極下釐庶工登賢屏姦復境  
攘戎內繼祖考畢其餘忠天胡難諶而止于此羣邪交



慶衆正心死矧予之衰竊究終始願言思公曷其有已  
嗚呼哀哉昔誦離騷舉公觴兮今拜以哭酬公堂兮私  
情公義兩怛傷兮神靈不昧尚克鑒予之衷腸兮嗚呼  
哀哉尚饗

祭樞密劉公文

張敬夫

嗚呼哀哉六月甲子喪我元臣如其可贖何直百身蓋  
積天下之望已久而閱天下之故已深其明足以斷謀  
于俄頃而剛毅足以任重于千鈞忠誠孚于君心惠澤

決于斯民威名懾乎姦宄義槩動乎三軍使之坐廟堂之上固足以厭患于未形而置之排難解紛之際不俟施為足以折衝于精神國虛柱石人失典刑此有識之士所以為天下惜而至泣涕沾巾者也嗚呼哀哉忠顯之烈感乎幽明貳卿之忠不忘請纓公自壯歲念其家聲虜馬飲江扈從時巡國有大政抗論前陳由斯而來蔚其直稱出而典州治本重人及其門閭潢池息兵遂登紫樞以翼政經收綱端本用尊朝廷凜然正色公言

是伸復牧于藩所至續聞抹荒之政近世莫倫旋觀設  
施靡藉靡替左右具宜久而愈新江湖轍環幾老于行  
人望公歸帝圖厥厯豈不用公未極于成嗚呼哀哉夫  
子知我匪契之云我之于公唯義是親相勉相勵期報  
吾君情深相得有同弟昆言念拜別乙未之春我車入  
南公往江濱眷言不舍語何諄諄豈期一濶而隔死生  
精爽在目我言孰聽嗚呼哀哉義當奔走送公歸轎屬  
其拘攣王事有程哭公家塾載遺此文禮雖不豐公鑒

其誠尚饗

祭樞密劉公文

謹為位致祭于故留守觀文樞密劉公之靈惟公德業孚于上下威望著于華夷宜秉國鈞以輔明主天不憖遺人之云亡夙蒙公知尤重傷痛為位家塾慟哭寫哀

祭樞密劉公文

嗚呼哀哉公之云亡既踰再時匪今之悲百年之思故歲之冬始奉遺墨一見淚流繼之以哭墨淡行斜如公

疲痛誦公之言則何昭晰始云國耻抱恨九原勉予忠  
義以報吾君中言先公銘志未立豈無他人予以執筆  
未復繼書嗟弟及子嗟予何人乃託以死精爽在上耳  
聞公言顧雖不武敢怠勉旃銘詩脫草遽遣薦陳獨慙  
荒蕪曷詔不泯貽書平父期守公訓告于二子罔墜厥  
命惟元誨君寔公所敬無求于外惟晦是聽公之息女  
當擇于歸顧予雖遠願與聞之凡公所命當以復公薄  
奠是將告于公宮

祭南軒張先生文

朱晦翁

嗚呼敬夫遽棄予而死也耶我昔求道未獲其友蔽莫予開吝莫予剖蓋自從公而觀于大業之規模察彼羣言之紛糾于是相與切磋以究之而又相厲以死守也丙戌之冬風雪南山解袂楮川今十五年公試畿輔公翔禁省公牧于南我遯岩嶺顯晦殊迹心莫與同書疏懇惻鬼神可通公尹江陵我官廬岳驛騎相望音問逾數去臘之窮有來自西告我公疾手書在携我觀于

時神理或僭是疾雖微已足深念函遺問訊閱月而歸  
叩函發書歎吒歔歔時友曾子寔同我憂揮涕請行詎  
不忍留曾行未幾公訃果至張侯適來相向反袂嗚呼  
敬夫竟棄予而死也耶惟公家傳忠孝學造精微外為  
軍民之所屬望內為學者之所依歸治民以寬事君以  
敬正大光明表裏輝映自我觀之非為十駕之弗及蓋  
未必終日言而可盡也矧聞公喪痛徹心膂緘詞寄哀  
不遑他語顧聞公之臨絕手遺疏以納忠召賓佐而與

訣委符節而告終蓋所謂得正而斃者也凜乎其有史  
魚之風此猶足以為吾道而增氣抑又可以上悟于宸  
聰又聞公于此時囑其弟以語予用斯文以為寄意懇  
懇而無餘顧何德以堪之然敢不竭其庸虛并矢詞以  
為報尚精爽其鑒茲嗚呼哀哉

又祭南軒張先生文

朱晦翁

嗚呼自孔孟之云遠聖學絕而莫繼得周翁與程子道  
乃抗而不墜然微言之輟響今未及乎百歲士各私其



所聞已不勝其乖異嗟唯我之與兄聰志同而心契或  
面講而未窮又書傳而不置蓋有我之所是而兄以為  
非亦有兄之所然而我之所議又有始所共鄉而終悟  
其偏亦有早所同擠而晚得其味蓋繳紛往返者幾十  
餘年末乃同歸而一致由是上而天道之微遠而聖言  
之秘近則進脩之方大則行藏之義以兄之明固已洞  
照而無遺若我之愚亦幸竊窺其一二然公喬木之故  
家而我衡茅之賤士兄高明而宏博我狷狹而迂滯故

我嘗謂兄宜以是行之當時兄亦謂我盍以是而傳之  
來裔蓋雖隱顯之或殊寔則交須而共濟不唯相知之  
甚審抑亦自靖而無愧嗚呼孰謂乃使公終在外以違  
其心予亦見縻于斯而所願將不遂也政使得間以就  
其書是亦任左肱而失右臂也傷哉吾道之窮予復何  
心于此時也惟脩身補過以畢餘年庶有以見兄于地  
下也聞兄之葬而不得臨獨南望長號以寄此酌也惟  
兄憐而鑒之尚陰有以輔予之志也嗚呼哀哉尚饗

祭呂伯恭著作文

朱晦翁

嗚呼哀哉天降割于斯文何其酷耶往歲已奪吾敬夫  
今者伯恭胡為又至于不淑耶道學將誰使之振君德  
將誰使之復後生將誰使之誨斯民將誰使之福耶經  
說將誰使之繼事記將誰使之續耶若我之愚則病將  
孰為之箴而過將誰為之督耶然則伯恭之亡曷為而  
不使我失聲而驚呼號天而慟哭耶嗚呼伯恭有著龜  
之智而處之若愚有河漢之辨而守之若訥胸有雲夢

之富而不以自多詞有黼黻之華而不易其出此固今之所難而未足以議公之彷彿也若乃孝友絕人而勉勵如弗及恬淡寡欲而持守不少懈盡言以納忠而羞為訐秉義以飭躬而耻為介是則古之君子尚或難之而吾伯恭猶欲然而未肯以自大也蓋其德宇寬洪識量閎廓既海納而川渟豈澄清而撓濁矧涵濡于先訓紹文獻于厥家又隆師而親友極探討之幽遐所以稟之既厚而養之深取之既博而成之粹宜所立之甚高

亦無求而不備故其講道于家則時雨之化進位于朝  
則鴻羽之儀造辟陳謨則宣公獨御之對承詔奏篇則  
右尹祈招之詩上方虛心而聽納衆亦注目其敷施何  
遭時之不遂遽縈疾而言歸慨一卧以三年尚左圖而  
右書間逍遙以曳杖恍沂上之風雩衆咸喜其有瘳冀  
卒摠其素蘊不惟傳道以著書抑亦後來之程準何此  
望之難必奄一夕而長終增有邦之殄瘁極吾黨之哀  
恫嗚呼哀哉我寔無似兄辱與遊講摩深切情義綢繆

粵前日之往書尚燦然其手筆始言沉痾之難除猶幸  
死期之未即中語簡編之次第卒誇草樹之深幽謂昔  
騰牋而有約盍今命駕以來游欣此旨之可懷凜訃車  
而偕至考日月之幾何不旦暮之三四嗚呼伯恭而遽  
死耶吾道之衰乃至此耶既為位以泄哀復緘辭以寓  
奠冀嗣歲之有間尚前言之可踐嗚呼哀哉尚饗

祭東萊先生文

周益公

嗚呼伯恭河嶽之英公卿之裔躬蹈五常心潛六藝學

富而醇文敏而麗通今不流博古不泥高明之識力去  
其蔽卓絕之行亦矜其細他人有一自足名世惟君兼  
之夫誰能儷蟬聯簪紱拾芥科第堂堂申公謂且能繼  
皇心是嘉召寘班綴成均博約館閣縈滯南宮表章史  
觀凡例主盟斯文每食忘瘠風淫末疾乘厥勞動歸哉  
毫祠可以自憇鑽堅仰高講疾彌勵曾不息鯨曾不補  
劓竟殞其生壽考誰制萬斛之舟江湖期濟觸石而傾  
未皇鼓柁千年之木梁棟可計遇風而摧乃萎薪桂才

也何多命也何戾生徒滿門相向雪涕縉紳諸儒咸惜  
其逝矧伊鄙夫辱在交契姓不同耳心即魯衛易箒莫  
親臨穴莫際寓詞西風揮此哀淚嗚呼哀哉尚饗

祭東萊先生文

辛幼安

某官天資之美道學之粹操存之既固而充養之至一  
私欲未萌于心極萬變不足以移其志故不力而勇甚  
和而毅泯愛憎以無迹更毀譽而一致宜君上益信其  
賢而同異者莫得窺其際也任重道遠發軔早歲遺外



形體輟寢忘寐事物之來若未始經吾意迨夫審是決  
疑則精微正大中在物之理而盡處物之義私淑諸人  
固已設科不拒聞者心醉道者志得抑將使羣才而衆  
志咸遂也乃若生長見聞人物門地高文大冊博覽彊  
記雖皆過絕于人要之蓋其餘事厥今上承伊洛遠泝  
洙泗僉曰朱張東萊屹鼎立于一世學者有宗聖傳不  
墜又皆齒壯而力強夫何南軒亡而公病發上方付公  
斯文謂究用其猶未傳聞既瘳士夫增氣忽反袂以相

弔驚郵傳于殄瘁嗚呼壽考之不究德業之未試室無人而子幼何福善而如是然而天所畀與者其得抑多又奚有以喬松之年趙孟之貴某半世傾風同朝托契當從游于南軒蓋于公而敬畏茲物論之共愠寧有懷于私惠緘沉詞于千里寓哀情于一酌尚饗

祭東萊先生文

葉正則

論何必深論不欲極使人心而有止則雖言而寧默緬道術其難知超聖賢之獨得雖經籍之具存蓋不成之

莫測昔余之于公也年有少長之序輩有後先之隔每將言而輒止意遲遲而太息今余之于公也喪前路之鄉導廢旁觀之軌則縱欲言而誰聞恨冥冥而不白人

才兮離合世道兮開塞彼蒼蒼之吉凶竟無所考兮余亦安能至此而不惑也紹興以來聞卑見陋士失常心顛錯昏晝非無豪傑力止自救公以生稟之資世家之舊脩義理于一身講源流于徧扣旣徹牖以並約亦隨才而獨秀由是東南之士夫拔起林岫為英為哲繼公

以後如雷雨之先物咸穎發而峒秀流蘋藻以萼擷潔  
黍稷以饋餽嗚呼公之施于世者止此而已至于不以  
記為博不以文為富器不止于一能學不期于偏就事  
欲折而愈精德欲充而蕪茂暢羣儒之異指續先民之  
遺胄周孔之業散而不述禹湯之功息而不奏若干載  
之有待又一朝而永謬疑古人之皆然倘今人而何咎  
恃哭泣之可忍徒薦哀于此酌尚饗

祭東萊先生文

嗚呼才難之嘆豈謂凡才治不如古亦云久哉思得一  
人庶幾于此才非不多未知孰是必有學窮本源亦窮  
根柢古今貫穿而守之以約規模宏大而不遺其細議  
論平正而得事幾之要人物兼取而無愛憎之累表裏  
如一俯仰無愧若人者夫然後退可以為後學之師表  
進可以居朝廷之大位覲斯民之小康抑吾道之不墜  
惟公其人歟胡為乎抱道而不得試嗚呼天之生公亦  
甚難而不易賦之德而畜其壽誘其衷而不使伸其志

蓋天子欲用而公以病病不可以有為矣卧家優游尚  
足以矜式于一世何疾困之夙昔而逝嘆此數年凋喪  
善類天乎又奪吾大賢是真可為痛哭流涕者某等登  
公之門嘗聞餘論之一二顧平時師仰之不暇者何敢  
知公之所至詩不云乎人之云亡邦國殄瘁抑公其人  
也相與設奠而哭以斯文茲豈曰吾徒之私意也耶嗚  
呼尚饗

五百家播芳大全文粹卷九十四

欽定四庫全書

五百家播芳大全文粹卷九十五

宋 魏齊賢

葉 茶同輯

祭文

名賢 尊官

三省祭楊信王文

趙德莊

四七之際雲雷以屯真人出焉帝命聿新何以畀之是



生虎臣維四三公莫與之倫顯允信王實久實親始焉  
鷹揚其動疑神晚而山立所擔自賓海無揚波邊靡游  
塵玉帶貂蟬日朝紫宸光明便蕃兩宮則均周廬岩岩  
我法是遵長淮茫漭我策是因凡士大夫多素拊循逝  
焉可贖人百其身惟帝念功殊典具臻錫之山川王爵  
用真金匱石室凌煙麒麟匪責其私皇威允振乃眷三  
世其忠其純不顯在茲尚啟後人惟時政路素接車茵  
悼賢憂國有涕盈衿嗚呼哀哉尚享

郎官祭陳文恭公文

嗚呼中興之相前後幾公功名盛矣鮮備于終公以何  
道行乎是中生而望尊歿而禮崇我聞王音曰文與恭  
匪我敢知尚耳其風夸者死權倡邪害忠帝用躬覽公始  
奮庸惟公之大衆寡畢容化為清朝莫不我從神聖授  
受天意所鍾揖遜在上堯舜與同惟公之誠貫通兩宮  
乃慈乃孝其樂雍雍虜狂無厭棄吉為凶猛士駭顧曷  
禦其鋒公曰我靜為群動宗民恃公在有如長虹

闕

讀如工和戰之議樊然相攻事至而驚宰席為  
空公曰我重彼偽自窮民拜公來有如卧龍漢節既班  
有來斯戎賴公端冕劍履在躬皎然日星以瞭彼蒙豈  
期夢奠暴疾是逢天雨固陰震驚清衷備物典冊致哀  
于隆嗚呼曩公暫休四海顛顛今其已矣愚智所恫丹  
旒素車感泣兒童矧茲省戶寔厠羣工一觴致駮莫報  
所蒙

路祭王樞密文

嗚呼聖賢相逢廟堂孔尊國家閒暇賢雋滿門公居其中  
中協調化元屹如巨嶽鎮彼厚坤云胡不留夜舟遽奔  
意公清明視茲囂煩相彼故鄉乃丘乃園盍告其歸脫  
冕與軒民我不念尚曰子孫堂堂去之豈其少息維古  
至人逝而長存化為星辰上登紫垣天人之樂非世所  
論我挽而拜公不我言長江其流飛旒其翩都門之奠  
祇消我魂

路祭王樞密文

嗚呼大江之東江湖漭瀾篤生異人為王者師坐撫宇宙浩其無涯豈曰雲夢萬頃之波有開必先非世敢知遇龍于潛天意在茲左右是侍西南是釐曷遠匪邇曷險匪夷爰其來歸大計所咨有筮其短忘我寶龜國論既公允也其時乃眷兵本密命以基玉帛之交桑土之思如厦新楹如汲斯縻惟公堂堂松柏是儀吉月不朝遽駭良醫何以報上忠言是遺何以傳世盛德是貽凡我省戶公寔我私有來郊奠奠極其詞

祭程相公琳文

王介甫

嗚呼公在京師為天子毘發論疆疆不苟其為公于四方為鎮為屏推良抑姦兩適寬猛自伯休父有稱于周及公千年追配前休時文而文時武而武顧我無狀辱公等件庶見吉召乃聞凶歸馳哀一觴終古之違

祭韓丞相文

竹隱畸士

我欲哭公涕淚交頤公之于我未嘗有私我欲不哭心傷志摧不假以淚孰知我哀公之平生富貴壽考何所

欠亡使我傷悼公之初終進退毀譽我知哭公無豫以此再世相國士滿天下今還故鄉誰哭公者非公媾媾獨我之哭如公也存昔官太學遂斥江左我則負公公寔知我十年之間顛頓困窮所以不晦懼其辱公今公逝矣莫遠公喪欲我之齒哭公不忘

祭范丞相文

陳了翁

維年月日叙復宣德郎陳某謹遣人以清酌庶羞之奠致祭于故觀文相公范公之靈昔文正公在仁祖時忠

于謀國衆在所依心虛而明照了不疑先事而慮告如  
著龜兩遭勅榜益奮不移外禦元昊數蹈禍機國勢既  
安奚惜我危考公行事允也似之安不擇地難不敢辭  
至於言兵則曰不知豈曰為畧各遵其時不述其迹是  
乃無違三年遽改生事者誰蔡公南行公獨救之一勝  
一負其兆在茲公可以默又進忱辭人亦有言公爾忘  
私孰能臨義捨安取危一斥四年宣發始歸天子哀憐  
拜命涕洟其口不言意欲有私人願公留為帝龍夔病



不能對人所嘆咨天子曰吁疾尚可為錫以上劑臨遣  
國醫丁寧訓飭速療勿遲云何不救竟至于斯嗚呼哀  
哉公果已矣與世思公公不來矣人之于公有合有睽  
聞公之歿睽者亦悲情隔生死公論乃出悲公之人始  
自今日臨終不昧忍死有述小其一身大我王室置小  
恤大自初訖終可使聞者勸而作忠太宗征遼喬死不  
忘公之所慮奚獨一二願借生靈願合朋黨願為宣仁  
一洗誣謗願正其事願辨其人願以中道行帝之仁嗚

呼哀哉言惟心聲孰無此聲孰有此誠神氣雖大如人之形愛養胃氣可以保生陽明之經徧于四體呼吸之間無有不至左絡連右首脈應趾中經流行寧有定位彼執一者棄異取同異我曰偏同我曰中語各有心心各有物孰能審是而不恤彼公獨有言繼者誰乎公薨我悲豈緣葭莩公昔南遷我在北陞側身以望心往從之及公之還我有言責陳留雖近欲往不得平生想慕獨未識公見公之心何必取容文正歿後公又亡矣仲

李方興公復有子其門益大其道益光公可無憾我亦  
奚傷嗚呼哀哉伏惟尚享

祭吳沖卿相公文

王介甫

嗚呼公命在酉長我一時公先我茁我後公姜中間仕  
宦有合有離後我所踐公輒仍之出則交轡處則連棖  
坐肘則並行肩則差豈願敢及天實我貽公之停蓄及  
所設施有誥有誄亦有銘詩又將有史傳所不疑我既  
億耗何辭能為婚姻之故唯以告悲尚享

祭陳秀公墓文

熊子復

惟公道闢百聖浩浩大儒功著三朝岩岩真宰晚以丹陽之節歸于綠野之廬傳說騎箕遂復星辰之列周公葬畢尚留丘壟之藏克也孤生最為後進雖不及見夫子于鄉黨側聽微言然亦嘗趨丞相之祠堂仰瞻遺像茲陳菲具敬拜佳城去歲百以若存諒九原而可作

祭高樞密文

王介甫

越初生民降訖于茲廢興亂治成敗安危猷為之君辨

論之師章書傳記箴賦銘詩非離詭駁有萬其詞公于其間靡所不知江含海蓄其富益訾孰窮其源孰究其涯作時宗工出長羣司洋洋厥聞可以敷施謂且永年左右輒咨曷云其凶弗耄弗期凡我常僚曷已其思為此薄物以將我悲

祭宋樞密文

王元之

嗚呼昔在先朝命卿赴舉公名藉甚衆推獨步伊予不佞敢云接武片善謏聞亦或許與公既策名予果下第

恨不同時終身負愧其後九年俱陞掖垣更置鎖闥對  
掌王言銀艾金紫渥澤便蕃公領秋漕我司大理執法  
議刑以直被毀側目倖臣搶頭獄吏由我之禍為公之  
累謫去周行商于武當共嗟懸磬俱有高堂都門馬上  
洒涕其滂徵還館殿斂翼徊翔牽復綸閣重霑寵光曾  
未滿歲齊歸玉堂嗟予蹇剝黜去滁陽三年兩郡奔走  
靡遑歸來相見家憂國喪拊膺殆絕腸目增傷推轂相  
授拔茅盡力公登內樞我還西掖又領齊安曾未煖席

惟公驚怛為我開釋來訪衡門不慮近職吾兒作掾吾  
家在京問訊餽餉見公之誠八鑿順動萬務縱橫運籌  
扈蹕勞心竭精既神用之無愆致風恙之內并扶疾而  
還捐館澶淵恩加等兮死王事壽知命兮終天命嗚呼  
哀哉誰知昔別便為永訣燕許文章歐虞筆札識度精  
遠行義高潔孝友無倫謙和有節惟懿範與清芬肯誰  
物而殞絕嗚呼哀哉虺有毒何享年而不死狐狸無  
德何通神而難老淑人君子胡不壽考黃河之渙清江

之渭未脫郡印遙瞻總惟默默千古悠悠四時音容寂  
寞涕泗漣洏寫哀誠而一奠冀神靈予格思伏惟尚享

祭江端明文

呂伯恭

嗚呼開之大者若將有屬聚之粹者其不徒生猗衆萬  
之弗齊公取數其獨羸培之以鎮岳之渾厚淪之以  
澗瀝之清明其任重則軼材絕識不能足其志其道遠  
則貴名顯仕不能留其行既予其資又乘其會蓋南渡  
羣賢皆在之時而北方餘論未衰之際欵門墻而遍歷



躋堂奧而獨詣合諸老之規模而融其異同摠一代之  
統紀而摭其精粹更侍從于兩朝凜大節之弗渝慮先  
本根則或以為緩動据憲章則或以為拘奮論陳義則  
或尤其亟彌綸藏用則或咎其徐少而論和既不詭隨  
於小人之黨晚而論戰復不能苟同於君子之徒雖屢  
起而屢仆守常度而自如外屏衛于翰藩亦大體之可  
識明振毫末而終出于恕知兼僚屬而各付以職外視  
高雅而中寔密察外視寬弛而中寔肅給鎮撫經遠不

求歲月之效悃愍務寔不事耳目之飾雖權脅而勢移  
迄歸然而山立晚進後出自相長雄廣坐衆席舊人罕  
逢大雅之音尚聞於公學則正統文則正宗樂易平曠  
前輩之風崇深簡重前輩之容士駭未見或姍或攻以  
身存法獨殿其衝典則不墜繫公之功嗚呼進退有義  
弛張有時其用其舍我不敢知至於濩落叢祠之秩所  
取者甚狹荒寒蕭寺之居所處者甚卑假十數年之壽  
考作二三子之指歸共簞瓢之淡薄緝簡編之闕遺于

造物其何費乃一夕而奪之然則開之大者竟亦何意  
聚之粹者蓋亦何為瞻天運之鴻濛非小人之所闕呼  
蒼昊而上想則匪公之素期嗚呼繼自今以往鎮定大  
事顧盼係輕重者不復嗣矣敷建大論呼吸判成敗者  
不復聞矣百年未明之心迹不復究其實矣羣籍未辨  
之真贋不復審其是矣斯文將安所寄斯民將安所徯  
矣某佩鞶趨隅木行兩周錄其世舊教育綢繆肝膈洞  
照泯然相投大何理之不講小何事之不諏幸三邦之

接畛謂事業之可醜濶馨歎其未幾忽赴車之停輶亟  
宿春而聽役淚淋浪而莫收炯話言之如在策蹇步而  
敢媮蠲此心而明薦夫何有乎醜羞尚享

祭王端明文

張敬夫

嗚呼公之盛名蓋四十年有如黃鐘大呂歸然在懸使  
未考擊人之望之亦知其為衆樂之先惟平日之所履  
每務倣乎昔賢不與世以交鶩不絕俗而孤蹇獨孝義  
以欸欸而懷忠之拳拳苟片善之足取必挽後而推前

或所趨之有違敢妄假於色言顧規摹之若是當斯世  
之其然昔棲遲于下僚窮師友之淵源逮顯用于王朝  
論据經而不偏寔衆芳之所宗蔚佩蘭而握荃屢賦政  
于藩方亦惠澤之究宣晚卧柯山靜觀其旋方玩心于  
羲經不自放而益虔隱聲寔之逾隆竚側席之招延何  
大命之止斯嘆莫返于逝川痛易箒于蕭寺無居宅之  
一椽嗚呼前輩風流于今邈焉典刑云亡後生孰傳念  
言愚蹤公所知憐義篤金石久而彌堅書猶在手人隔

九原屬拘印綬奔走莫緣孰知予悲涕泗而連尚享

祭姚端明文

惟公早試劇煩見才猷之敏卻晚登廊廟都寵數之便  
蕃方新十國之瞻遽作九原之隔凡茲民吏孰不傷嗟  
某昔歲朝班嘗奉笑言之歎如今官守幸遵規畫之餘  
願托契于交承敢異情于生死遠將一奠少見鄙誠尚  
享

祭石安正御史文

趙承之

公之少時以學自善讀書不休下筆滿紙囊雖無金甌  
則有塵挾書琅琅聲聒四鄰乃游京師乃試太學凜然  
長空見此一鶚公既壯矣乃試為吏城旦之書初不經  
意顧謂洪令豈遠人情刺得其端老胥大驚安宜之政  
譽出一口民到于今蔽芾五柳才良行完早夜刻治勇  
于有為以自設施元符之初乃擢御史聖皇有作復續  
其事遂遷執法以長憲僚言如轉規契若投膠寵靈便  
蕃聲望翁赫霖雨逡巡袞衣咫尺勤其一生維志之求

既恊于時命乃不謀嗟乎悲矣公曰哀矣曰未渠央而  
止斯矣嗚呼哀哉鈞臣昔者佐公為縣傾蓋之歡自于  
一面逮于兒女綢繆密姻終始倚愛寔懷高詣公病卧  
家謂必復起如何忽然而以訃至衣冠偉若笑語諄如  
我不見矣泣淚漣如嗚呼哀哉龜筮既吉塋車在途豈  
不欲往畏此簡書有肉在俎有酒在壘我不飲食孰知  
我哀尚享

祭薛大資文

汪彥章



嗚呼惟公道學得之鍾公如郢堊鼻揮斤者般坐根聲  
譽雷驚瀑湧帝顧駟駁宜歸廡閉首付言責繩愆糾奸  
旋置臺閣翱翔兩班學省詞禁英髦所蒙公一揚歷陳  
言悉刪遂秉大政嘉謀必關功在宗祐澤流寡鰥為時  
元老二十年間身被三組腰圍九鑲榮寵雖極視猶觸  
蠻某也晚學羈靡鈍頑當路孰視云誰肯扳公獨與進  
為之解顏曰此孤秀擢于葦管極力推挽卒辭伏跼歲  
在丙午威弧始彎天子南狩朝廷孔艱公實舊德人期

賜環顧斂英氣頻洲慕灣詩酒陶寫漁樵往還許國心  
壯憂時髮斑猥辱茲土日虞曠鯨公屈小擢來臨市闌  
燕笑未幾遺言已頌壽且八十人猶公慳望樞百里無  
緣往攀一樽馳酹詞訖涕潛尚享

祭許大資文

李伯紀

嗚呼天地磅礴河岳炳靈篤生異人鬱為世英長松老  
鶴其儀刑也粹玉精金其性情也澄淵藻鑑燭理明也  
設準持衡稱物平也經緯書史文章成也貫通古今議

論閔也金石鏗鏘詩句清也鸞鵠翔翥字畫精也勇于  
名義去就輕也憂國如家秉忠誠也致位通顯不自榮  
也恬憺寂寞得此生也士一于此垂世立名而公兼之  
以大其聲嗚呼哀哉易道陰陽消長盛衰春秋名分褒  
貶是非彌綸天地立萬世規先聖制作孰大于斯公獨  
潛心抉摘杳微解駁三傳批糠九師發明象數得其指  
歸義畫麟經粲然有輝嗚呼哀哉漢有祿隱時惟子雲  
英林拔萃高識邁倫擬古著書法言太玄士有異論或

否或然公獨教之推尊其人計釋微詞奧義一新所見  
絕俗豈其後身嗚呼哀哉我之識公踰二十年史館同  
僚飽聞緒言樞府槐堂兩接官聯引身以退歸騎連翩  
我則湖外公寓江邊邂逅相遇廬山之樊握手深談達  
旦不眠我適嶺海觸冒瘴烟與死為鄰鮫鱐垂涎尺書  
屢及夫豈相憐迨其比隣喜見顏間願言相從杖屨林  
泉云湖奄忽朝露溘先傷心涕零三丈之篇嗚呼哀哉  
國步艱難賢知驅馳梁棟之壞哲人遽萎藐然一老天

不慙遺人之云亡有識同悲旅櫬漂泊臨川之湄無適  
非土公其永歸聊具薄奠侑此以辭英爽不泯庶其聽  
之尚享

祭吳尚書文

趙承之

昔在元符我官定武公秉使節來攝軍府我穉且愚語  
不出口公獨憐之顧我良厚有詔求士陋不及我公曰  
子偕衆不我可其後七年歸自越川流離困苦維食是  
謀豈無高門懦不敢倚雖或見公蓋一再耳公眷之甚

不知我碩欲以鼠璞側諸玉間經營苦辛卒見笑鄙公  
蒙其羞我故之以我雖蹭蹬公厚不薄慰薦以詞志從  
其各惟士遇合必以其徒王公之門利達所趨公位寢  
顯不棄我輩其所以逐豈容人累嗚呼哀哉再召還朝  
謂必師保既老而歸曰其壽考誰弗慙此兩俱失之有  
德有言豈遽沒之我賤且窮隨牒邊鄙觴以將公慟哭  
而已尚饗

祭劉尚書文

祝咨謀

嗚呼士有負高明之學而不見知于人主茲為可恨也  
公則無之士有抱經濟之才而不見施于當世茲為可  
恨也公則無之公有可為大恨而識與不識亦當不為  
恨者事親孝而凶人以為不孝是為曾參殺人也可不  
為大恨乎事君忠而凶人以為不忠是為夷齊盜國也  
可不為大恨乎尚賴天子仁聖皇天降監蹈不測之禍  
而能出萬死之中觸瘴霧之中而卒能保其躬數盡而  
逝人誰不然命乎天耶夫復何言試淚一奠永訣終天

嗚呼哀哉尚饗

祭王殿撰文

吳元及

江海炳靈為公之氣局高衡孕粹為公之神鋒妙齡秀  
發藉藉時譽壯歲從官蹇蹇匪躬若乃作尹赤邑轉漕  
畿東吏術之高權貴斂手心計之妙天府日充即退之  
今河南士安領鹽鐵高蹈古人之蹤名實播于眾口姓  
字達于帝聰謂當膺百世非常之選羽儀臺閣獻納殿  
陛究其所學而暴白其事功進不由道公寧固窮嗚呼



大觀政和之間柄臣專政呼吸雷風仰公之俊德願出  
我門人心則同公若必貶則鑿坡玉堂荷橐簪筆固在  
公之券中直道而行不卑小官繡衣金節淹回于外臺  
者蓋將一星措紳歎息而公曾不畧芥帶于心胸其人  
御天風虎雲龍抗章請老均逸詞宮杖屨逍遙黑髮方  
瞳子孫玉立綵衣蒙茸森王家之杞梓芬謝砌之芝蘭  
知公陰德之有後羨公流慶之甚豐宜齊齡于遼鶴比  
秀于莊椿哲人其萎莫量彼窮某以小女之無似獲奉

巾幘于公之叔嗣愧女蘿之短弱幸依託于長松念蕭  
寺之言離陪樽俎之從容恍一別之七年徒書問之時  
通忽丹旆之來歸痛涕泗之無從有殽在籩有酒在樽  
關  
冀公情好之如生魂髣髴  
而鑒其衷尚享

祭鄭狀元文

黃國錄

惟靈處畎畝而志在廊廟以韋布而氣凌公卿成均獻  
書天子色動金鑿秀筆推毫膽驚華問鉤錚于宇宙高

文烜赫于著庭蓋其學本仁義故無詭說中蹈中庸故  
無矯名方習俗之澆薄賴公稽古之禮行古之道以藥  
其意病方士風之委靡賴公其操也特其論也正以支  
其將傾舍香蘭省姑試其攝事剖竹名城將觀其治民  
如鵬之飛勢摩九霄胡為而遽折其翼如車之載日適  
萬里胡為而遽毀其衡雖公之精神同流天地固不恃  
形而立然公死之異遠近傳播孰不驚嗟而涕零其等  
久諧色笑俄隔幽冥非真告哀蓋亦傷乎吾道之無人

尚享

祭鄭狀元文

黃國錄

惟靈不遠之復由顏而得故視聽言動已常自克至大之養自軻而傳故貧賤富貴氣常浩然以布衣陳事而敢論時政之可論以詞坡對策而能言諫官之未言小人以懼而君子以持士氣益增而吾道益尊何承明之厭直將力求于補藩何迓者之在途而弔者盈門豈非以直道處世者易以懼人于機穽故運神而解者亦所

以全其天某忝同舍選叨在盧前屬以多病賴公着鞭  
以塞學校師儒之責以酬君親教育之恩駭聞凶訃如  
失鵠原含哀菲奠少慰幽魂尚享

祭呂侍讀文

王介甫

嗚呼伯夷相唐尚父賓周受氏昨國重光奕休千辰之  
逢發我文靖公寔冢嗣繼前之慶御書翰林典禮太常  
是為世臣焜燿家邦方審方奮厥隕誰使震驚咨嗟上  
自天子凡居此列惟公弟僚于公之殯祇薦醪羞尚享

祭鄭庭誨文

毛滂

石梁鬱然上有佳氣下走清湍音聞異人相攜盤桓寥  
寥至今漁樵所安尚意山間人必有異下乃君廬長廊  
甲第記初識君在稠人中狐熊傲兀知不可籠一見傾  
蓋定交樽俎豈惟聯姻氣則相許予才闕茸寡諧于世  
所賴得君差強人意奮然高談氣蓋一座有非吾曹瞪  
目欲唾君實偉人秀眉竒狀使當卒學仕必人上退託  
于酒日飲亡何羽衣岸巾枕麴而哦小詩立成晚更婉

熟不樸不圓元和賸馥揮金如土結客如市遠韻倏然  
形骸之外名利之徒其隘如髮敗意苦心十居七八開  
口一笑人生能幾君醉不知笑以不齒君年不足行樂  
則過胡用百憂齒搖髮墮曩子西征相酌以酒酣歌悲  
壯起舞為壽予為此別行當來歸當益釀酒從容遨嬉  
予歸酒熟公不復臨有佳風月如聆車音薦酒君堂予  
目泫然呼君不聞是豈醉眠

五百家播芳大全文粹卷九十五